

Ecclesiarum res, et bona, saeculares non occupent.

Articulus 21.

Adjicientes statutis superioribus statuimus; quod nullus Comes, Banus, Waywoda, seu alius Officialis Regius, cujuscunque conditionis, denominationis, et dignitatis existat, Ecclesias Episcopales, Archi-Episcopales, Abbatiales, Praepositales, et alias quascunque Regio jure patronatus disponendas; earundemque tenutas, pertinentias, decimas et possessiones, intra terminos et limites sui honoris, seu officialatus; absque speciali mandato Regio, occupare; aut se de eisdem, partialiter, vel totaliter ingerere praesumat.

ALBERTI REGIS DECRETUM UNICUM, ANNI 1439.

De lucro Camerae, Quinquagesima et Mardurinis.

Articulus 7.

Lucrum Camerae, in Regno Ungariae: Quinquagesimam in partibus Transylvaniensibus, ac Mardurinas Regno Sclavoniae, exigi consuetas; more alias ab antiquo consueto, exigi faciemus.

§. 1. Reducentes ad statum, tempore praefati quondam Domini Ludovici Regis, *) observatum.

LADISLAI POSTHUMI REGIS DECRETUM II. ANNI 1454.

Regnum Sclavoniae et aliae Provinciae, ac Civitates Regiae; adinstar aliorum Regnicolarum Regni Ungariae, militare teneantur.

Articulus 9.

Item, omnes Liberae Civitates, tam nostrae Regales et Reginales, quam Dominorum Despoti et Comitum Ciliae, aut aliorum Magnatum; nec non totum Regnum nostrum Sclavoniae, de quibus lucrum Camerae nostrae solvi non consuevisset; modo praemisso, connumerari debeant.

§. 1. Et similiter Philistaei, Comani, Valachi, et Tartari connumerati, debeant exercituare.

MATTHIAE I. SEU CORV. REG. DECRETUM II. ANNI 1464.

Regnum Sclavoniae et Partes Transylvaniae, in libertatibus suis conserventur.

Articulus 13.

Regnum nostrum Sclavoniae et Partes Transylvaniae; in omnibus antiquis bonis libertatibus, consuetudinibus et juribus suis conserventur. **)

*) Ejusd. Decreti, art. 12.

**) Confirmatur An. 1649. art. 33.